



Broj: 07-11-1216/21
Vogošća, 09.09.2021. godine

Na osnovu člana 70. Zakona o javnim nabavkama BiH ("Službeni glasnik BiH" broj: 39/14), i čl. 71. i 125. Statuta Općine Vogošća ("Službene novine Kantona Sarajevo", broj 27/14 i 14/15 Prečišćeni tekst), Općinski načelnik dana 09.09.2021. godine donio je

**ODLUKU
O IZBORU NAJPOVOLJNIJEG PONUĐAČA ZA IZVOĐENJE RADOVA NA
REKONSTRUKCIJI SAOBRAĆAJNICE I MOSTA U ULICI BRAĆE PLANJA U SKLOPU
NOVE INDUSTRIJSKE ZONE, NA PODRUČJU OPĆINE VOGOŠĆA**

Član 1.

Ponuda ponuđača "Termo-beton" d.o.o Breza, ulica Potkraj bb. Breza, odabrana je za izvođenje radova na rekonstrukciji saobraćajnice i mosta u Ulici Braće Planja u sklopu Nove industrijske zone, na području Općine Vogošća, kao jedina formalno-pravno ispravna ponuda, sa ponuđenom ukupnom cijenom nabavke u iznosu od 575.163,37 KM bez uračunatog PDV-a, odnosno 672.941,15 KM sa uračunatim PDV-om.

Član 2.

Odluka o izboru najpovoljnijeg ponuđača će biti objavljena na web stranici Općine Vogošća, istovremeno s upućivanjem ponuđačima koji su učestvovali u postupku javne nabavke, u skladu sa članom 70. stav 6. Zakona o javnim nabavkama BiH.

OBRAZLOŽENJE

Općinski načelnik je dana 27.07.2021. godine donio Odluku o pokretanju Otvorenog postupka nabavke radova na rekonstrukciji saobraćajnice i mosta u Ulici Braće Planja u sklopu Nove industrijske zone, na području Općine Vogošća, zajedno sa objavljivanjem Obavještenja o nabavci i tenderske dokumentacije na Portalu javnih nabavki BiH dana 29.07.2021. godine pod brojem: 1353-1-3-144-3-107/21.

Sažetak Obavještenja o nabavci objavljen je u "Službenom glasniku BiH" broj: 50/21 od 06.08.2021. godine.

Tendersku dokumentaciju sa Portala javnih nabavki BiH su preuzela 22 (dvadeset i dva) ponuđača.

Krajnji rok za dostavu ponuda bio je 18.08.2021. godine do 12:00 sati, te je izvršeno javno otvaranje ponuda, što je konstatovano Zapisnikom sa otvaranja ponuda od 18.08.2021. godine.

Nakon izvršenog otvaranja ponuda, Komisija za javne nabavke je pristupila analizi dokumentacije priložene uz ponude, u smislu provjere njihove validnosti, s obzirom na iskazane zahtjeve ugovornog organa u Tenderskoj dokumentaciji broj: 07-11-1216/21 iz jula 2021. godine. godine, odnosno pregledu ponuda u skladu sa procedurama i pravilima utvrđenim Tenderskom dokumentacijom, te Zakonom o javnim nabavkama BiH i pripadajućim podzakonskim aktima.

Shodno navedenom Zapisniku sa otvaranja ponuda, Komisija za javne nabavke je konstatovala da su zaprimljene 2 (dvije) ponude i to:

R.B.	NAZIV PONUĐAČA/GRUPE PONUĐAČA	UKUPNA CIJENA (KM) bez PDV-a	POPUST	CIJENA (KM)SA POPUSTOM bez PDV-a	UKUPNA CIJENA (KM) sa PDV-om
1	"Špic beton" d.o.o. Zenica	555.178,97	/	/	649.559,39
2	"Termo-beton" d.o.o. Breza	575.163,37	/	/	672.941,15

Uvidom u priloženu dokumentaciju i suštinskom provjerom sadržaja i validnosti iste, Komisija za javne nabavke je utvrdila sljedeće:

Ponuda ponuđača "Špic beton" d.o.o. Zenica ne ispunjava formalno-pravne uslove tražene Tenderskom dokumentacijom i to:

- Tačkom 7.4.1. pod a) TD je zahtjevano da je ponuđač kao izvođač radova u posljednjih 5 (pet) godina računajući od dana podnošenja ponude, realizovao minimalno jedan ugovor čiji je karakter i kompleksnost isti ili sličan onom koji se odnosi na predmetnu nabavku (objekti niskogradnje: mostovi, vijadukti, nadputnjaci, potputnjaci i betonski propusti većih gabarita koji nisu izvedeni od montažnih elemenata ili saobraćajnice ili kanalizacija) u ukupnoj vrijednosti od 560.000,00 KM bez uračunatog PDV-a. Učešće ugovora realizovanih na izvođenju saobraćajnica ili kanalizacije u ukupnom traženom iznosu je trebao biti minimalno 200.000,00 KM bez PDV-a i to za saobraćajnice min. 100.000,00 KM i za kanalizaciju min. 100.000,00 KM, odnosno ugovori za objekte niskogradnje su trebali imati vrijednost od minimalno 360.000,00 KM bez PDV-a, tj.

R.br.	Oblast	Iznos učešća u ukupnoj referenci
1	Objekti niskogradnje	min. 360.000,00 KM
2	Saobraćajnice	min. 100.000,00 KM
3	Kanalizacija	min. 100.000,00 KM
UKUPNO:		560.000,00 KM

Ponuđač "Špic beton" d.o.o. Zenica je u svojoj Ponudi (strana 36. Ponude) kao dokaz za traženo dostavio Potvrdu o uredno izvršenom Ugovoru broj: 02/01-02-586/20 od 13.05.2020. godine izdatu od strane Grada Visoko.

Komisija za javne nabavke iz dostavljene Potvrde je utvrdila da je radove kao Izvođač izvodio Konzorcij "Špic beton" d.o.o. Zenica i "Porobić" d.o.o. Zavidovići, te nije bila u mogućnosti pravilno ocjeniti priloženu Potvrdu iz razloga što u istoj nije navedeno učešće-odnosno procenat zastupljenosti svakog pojedinačnog ponuđača u realizaciji predmetnog ugovora.

Dana 30.08.2021. godine Komisija za javne nabavke obratila se Gradu Visoko sa Zahtjevom za pojašnjenje izdate Potvrde, te da isti kao Investitori i izdavaoci Potvrde tačno definišu procenat učešća firmi u Konzorciju.

Međutim, u dostavljenom odgovoru od strane Grada Visoko zaprimljenog dana 07.09.2021. godine izjavljeno je da Grad Visoko kao Investitor tj. ugovorni organ ne raspolaže traženim podacima. Komisiji za javne nabavke je uz odgovor dostavljena kopija predmetnog Ugovora, prva stranica kopije okončane situacije kao i kopija fiskalnog računa.

Iz dostavljenih dokumenata se ne može cijeliti i utvrditi zastupljenost firmi u predmetnom Konzorciju, te stoga Komisija za javne nabavke smatra da dostavljena Potvrda nije validna, tj. ne ispunjava jasne uslove propisane odredbama člana 48. stav 3. Zakona o javnim nabavkama BiH.

Ostale dostavljene potvrde u Ponudi ponuđača "Špic beton" d.o.o. Zenica, a koje se odnose na objekte niskogradnje u zbiru daju iznos od 268.552,91 KM bez uračunatog PDV-a, što nije dovoljno kao referenca, jer je zahtjevan iznos od minimalno 360.000,00 KM bez PDV-a za objekte niskogradnje.

- Tačkom 7.4.1. pod b) TD, a u skladu sa članom 51. Zakona je tražena obrazovna i profesionalna kvalifikacija lica koja su angažovana na izvođenju konkretnih radova i to da ponuđač između ostalog ima na raspolaganju i:
 - 3 (tri) lica, SSS ili VŠS saobraćajne struke-III ili V stepen, smjer rukovalac građevinskim mašinama (KV ili VKV rukovaoci građevinskim mašinama).

Tačkom 7.4.2. pod b) TD je pored ostalih zahtjeva traženo da se za 3 (tri) lica, SSS ili VŠS saobraćajne struke-III ili V stepen, smjer rukovalac građevinskim mašinama (KV ili VKV rukovaoci građevinskim mašinama) dostave Diplome/Svjedočanstva o završenoj traženoj stručnoj spremi i dokazi o radnom angažmanu, uz napomenu da dokazi koji se dostavljaju moraju biti originali ili ovjerene kopije.

Ponuđač "Špic beton" d.o.o. Zenica je u svojoj Ponudi (strana 85-88. Ponude) kao dokaz za traženo dostavio Diplomom o završenom srednjem obrazovanju odraslih broj: 350-21/2021 od 31.05.2021. godine, izdatu od PU Centar za obrazovanje odraslih "Eduka BH" Tešanj, a kojom se dokazuje da je Mirsad Luković stekao zvanje rukovalac građevinskih i pretovarnih mašina.

Uvažavajući dostavljeno, Komisija za javne nabavke smatra da dostavljena ovjerena kopija Diplome u Ponudi ponuđača "Špic beton" d.o.o. Zenica nije ovjerena od strane nadležnog organa na ispravan način. Naime, Komisija za javne nabavke smatra problematičnim činjenicu da se kopija dokumenta sastoji od 4 (četiri) stranice, dok Općina Maglaj ovjeravajući predmetnu kopiju dokumenta nije stavila pečat između prve i druge stranice dokumenta (strana 85-86. Ponude), a što je direktno utjecalo na formalno-pravnu ispravnost dostavljenog dokumenta.

Navedene činjenice kao žalbene navode koji su usvojeni kao osnovani potvrđuje i praksa Ureda za razmatranje žalbi BiH-Filijala Mostar kroz Rješenje broj: JN2-03-07-1-729-8/17 od 24.08.2017. godine.

- Tačkom 7.4.1. pod c) TD je propisano da Ponuđač mora posjedovati-imati na raspolaganju građevinske mašine i tehničku opremu neophodne za uspješno izvođenje predmetnih radova i to da ponuđač ima na raspolaganju i 1 (jedan) kombinovani radni stroj (utovarivač-rovokopač) i 2 (dva) bagera (rovokopača).
Kao dokazi za tražene mašine iz tačke 7.4.1. pod c) stavke 2. i 3. potrebno je bilo kao dokaze dostaviti važeće saobraćajne dozvole/potvrde o registraciji ili važeće upotrebne dozvole.

Ponuđač "Špic beton" d.o.o. Zenica je za traženo u svojoj Ponudi (strana 109-112. Ponude) dostavio dokaze za posjedovanje 3 mašine rovokopača, međutim nije dostavio dokaz da ima na raspolaganju kombinovanu radnu mašinu-utovarivač-rovokopač-traženu tačkom 7.4.1. pod c) stavka 2. TD.

Zbog prethodno navedenog, a u skladu sa odredbom člana 68. stav 4. Zakona o javnim nabavkama BiH ("Službeni glasnik BiH", broj 39/14) predmetna ponuda je formalno-pravno neispravna i kao takva nije prihvatljiva za ugovorni organ.

Detaljnim postupkom pregleda i ocjene ponude, Komisija za javne nabavke je utvrdila da ponuda ponuđača "Termo-beton" d.o.o. Breza ispunjava formalno-pravne uslove, odnosno zahtjeve ugovornog organa tražene Tenderskom dokumentacijom.

Zatim je Komisija za javne nabavke pristupila razmatranju finansijskog dijela ponude ponuđača "Termo-beton" d.o.o. Breza, te je izvršena računska provjera dostavljene ponude i utvrđeno je da nema računskih grešaka, a sve u skladu sa odredbom člana 17. stav 1. Uputstva za pripremu modela tenderske dokumentacije i ponuda ("Službeni glasnik BiH" broj: 90/14 i 20/15).

Obzirom da je Ponuda ponuđača "Termo-beton" d.o.o. Breza sa ukupnom ponuđenom cijenom u iznosu od 575.163,37 KM bez uračunatog PDV-a, prelazila procijenjenu vrijednost nabavke koja iznosi 560.000,00 KM bez uračunatog PDV-a, Komisija za javne nabavke je dana 08.09.2021. godine zatražila izjašnjenje od nadležne Službe da li može obezbijediti razliku sredstava u iznosu od 15.163,37 KM bez uračunatog PDV-a za realizaciju predmetne nabavke.

Služba za komunalne poslove se aktom broj: 07-11-1216/21 od 08.09.2021. godine očitovala da će obezbijediti razliku nedostajućih sredstava za realizaciju predmetne nabavke.

Iz navedenih razloga, a primjenom člana 64. stav 1. tačka b) Zakona o javnim nabavkama BiH ("Službeni glasnik BiH" broj: 39/14), Komisija za javne nabavke je jednoglasno dala preporuku Općinskom načelniku da donese Odluku o izboru najpovoljnijeg ponuđača "Termo-beton" d.o.o. Breza, za izvođenje radova na rekonstrukciji saobraćajnice i mosta u Ulici Braće Planja u sklopu Nove industrijske zone, na području Općine Vogošća, kao jedine formalno-pravno ispravne ponude, sa ponuđenom ukupnom cijenom nabavke u iznosu od 575.163,37 KM bez uračunatog PDV-a, odnosno 672.941,15 KM sa uračunatim PDV-om.

Pouka o pravnom lijeku: Ponuđač koji je učestvovao u postupku nadmetanja može radi zaštite svojih prava, u roku od deset dana od prijema Odluke o izboru najpovoljnijeg ponuđača izjaviti žalbu. Žalba se podnosi Uredu za razmatranje žalbi BiH putem ugovornog organa.

Izradio: Mirza Čutura

Mirza Čutura

Kontrolisala: Melisa Kršo

Melisa Kršo

Dostavljeno:

1. "Špic beton" d.o.o. Zenica
2. Termo-beton" d.o.o. Breza
3. Nadležnoj Službi
4. U dosije
5. a/a

032/456-147

032/784-005

